



Komunikadu Imprensa **15 Agostu 2019**

JSMP kontinua fahe informasaun kona-ba prosesu halo lei no asesu ba justisa formál ba comunidade sira

Iha 08 Agostu 2019, Judicial System Monitoring Programme (JSMP), kontinua habelar informasaun ba autoridade suku, membru konsellu suku no comunidade sira, partikularmente membru comunidade ema ho defisiénsia iha Suku Selo Craik, postu Administrativu Aileu Vila, Munisipiu Aileu. Treinamentu refere partisipa husi ema na'in 30 ne'ebé kompostu husi fetu na'in 11 no mane na'in 19.

Materia ba treinamentu konstitui sesaun 2, sesaun primeiru kona-ba demokrásia, knaar órgaun soberania sira-nian no prosesu atu halo lei no oinsá mak públiku bele hola parte, enkuantu sesaun segundu kona-ba asesu ba sistema justisa formal ne'ebé inklui direitu umanu, sistema justisa iha Timor-Leste, tipu krime no nia prosedimentu.

Treinamentu ne'e ho objetivu atu hasa'e koñesimentu membru konsellu suku no membru comunidade sira-nian, nune'e sira bele aplika iha prátika no halo intervensaun ruma tuir lei no tuir sistema justisa formál ne'ebé mak iha. Aleide ne'e, sira bele hatutan ba membru comunidade sira ne'ebé la hola fatin iha treinamentu ne'e.

Treinamentu ne'e importante ba membru konsellu suku sira tanba bele hakle'an liu tan sira-nia koñesimentu kona-ba sira-nia papél tuir Lei Nú. 9/2016 kona-ba Lei Suku nian, liuliu kona-ba oinsa bele trata kazu sira ne'ebé akontese iha sira-nia comunidade. Iha kazu balun ne'ebé tuir lei sira bele rezolve no iha balun ne'ebé la bele rezolve hanesan kazu sira relasiona ho krime públiku“, dehan Casimiro dos Santos, Diretór Interinu JSMP.

Xefe Suku Selo Craik Sr. Gabriel Mendonca, iha sesaun abertura husu ba partisipante sira hodi bele konsentra ba materia hirak ne'ebé JSMP sei fahe tanba konsidera katak materia ne'e importante tebes liga ho papél autoridade suku ne'ebé mak regula iha Lei Nú. 9/2016 kona-ba Lei Suku nian.

Iha treinamentu ne'e, partisipante sira halo komentáriu no hato'o sujestaun relasiona ho kestaun menus edukasaun sívika no polítika, partikularmente ba sidadaun sira ne'ebé tinan to'o ona tuir lei atu ezerse direitu polítika iha eleisaun. Nune'e partisipante sira sujere atu kria mekanizmu ida

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

kona-ba oinsá bele fó teste kona-ba koñesimentu jerál ba edukasaun sívika no polítika ba sidadaun sira ne'ebé too on idade atu trata kartaun eleitorál, nune'e sira bele iha ona koñesimentu natoon hodi bele hili partidu polítika ida ne'ebé di'ak hodi bele ukun povu no nasaun ne'e. Atu evita naran hili partidu ne'ebé laiha kapasidade atu ukun no lori prejuizu ba estadu no halo povu sai vítima.

Partisipante sira mós foti kestaun kona-ba oinsa rezolve problema sira ne'ebé mosu iha suku, partikularmente problema sira relasiona ho kazu violénsia doméstika (VD) no violasaun seksuál (VS). Relasiona ho kestaun ne'e, lia na'in suku ida ne'e husu pergunta kona-ba kazu sira ne'e seidak rejistu iha Ministériu Públiku maibé parte sira rasik mak hakarak husu atu rezolve de'it iha comunidade ho halo akordu atu labele halo tan.

Kestaun seluk relasiona ho atusaun polísia nian ne'ebé uza violénsia bainhira mosu problema baku malu entre joven sira. Pergunta seluk kona-ba relasaun seksuál entre menór sira.

Relasiona ho komentáriu no sujestaun partisipante sira nian ne'e, JSMP hateten katak iha demokrásia ema hotu-hotu iha direitu no devér hanesan atu partisipa iha eleisaun jerál hodi ezerse sira-nia direitu polítiku tuir Konstituisaun no lei haruka. JSMP mós hanoin no konsidera katak edukasaun sívika no polítika ne'e importante atu asegura katak partisipasaun sidadaun sira-nian iha foti desizaun polítika boot ba nasaun no povu nian ne'e la bele kria risku ne'ebé boot hanesan preokupasaun comunidade sira-nian ne'e. Enkuantu mekanizmu ne'ebé comunidade sira propoin ne'e bele iha possibilidade atu Governu kria mekanizmu hanesan ne'e, maibé iha parte seluk bele sai hanesan impedimentu ba sidadaun sira atu ezerse sira-nia direitu sivíl no polítika iha eleisaun sira.

Relasiona ho kestaun kazu VD no VS, JSMP esplika katak kazu ho natureza violénsia doméstika nu'udar krime públiku, maske autoridade lokál sira iha kompeténsia tuir lei atu rezolve, maibé autoridade lokal sira laiha kompetensia hodi hakotu kazu ne'e iha nivel suku, nune'e tenke prosesa liuhosi justisa formál. Akordu ne'ebé halo iha nível suku nian ne'e, nu'udar sirkunstánsia atenuante ba pena, maibé la'ós atu rezolve ka taka kazu ne'e. Tanba ne'e, autoridade lokál sira iha obrigasaun atu relata kazu ne'e ba instituisaun relevante sira hanesan polísia no Ministériu Públiku. Só krime sira ho natureza semi públiku mak autoridade lokál sira bele rezolve bainhira vítima hakarak atu rezolve, maibé bainhira vítima lakohi atu rezolve iha nivel suku, nia prosesu nafatin liuhosi justisa formál.

Enkuantu kestaun ida kona-ba relasaun seksuál entre menór sira ne'e, JSMP hatan katak lei la kesi ka kondena menór sira tanba sira seidak iha kapasidade atu komete krime ne'ebé bolu imputabilidade (Artigu 20 KP kona-ba inimputabilidade tanba idade). Nune'e, dalan atu rezolve sira-nia problema mak liuhosi edukasaun moral iha família no comunidade.

Iha parte seluk, Sr. Silvestre Pinto Monteiro hanesan partisipante ida iha treinamentu ne'e deklara katak durante ne'e sira ladun tau importánsia no hatene didi'ak sira-nia direitu sívika no polítika ne'ebé mak iha demokrásia sei fó poder tomak ba partidu ruma hodi ukun, maibé husi treinamentu JSMP nian ne'e sira foin hatene katak konsekuénsia ba deside sala bainhira povu ladun hatene di'ak ba partidu ida nia vizaun, programa no kapasidade bainhira sira ukun.

Treinamentu ne'e hetan apoiu hosi Governu Austrália liuhosi Embaixada Austrália iha Timor-Leste hamutuk ho ajénsia internasionál Governance for Development (GfD) Austrália.

Atu hetan informasaun liutan favor kontaktu direktamente:

Casimiro dos Santos

Diretór Interinu JSMP

E-mail: santos.cas76@gmail.com

Website : <http://www.jsmp.tl/>